

Tiada kenaikan yuran di UA tahun ini

➔ Tindakan bagi memastikan semua pelajar dapat peluang lanjut pelajaran

Oleh Mohd Shukor Amin
bhnews@bh.com.my

▪ Sungai Besar

Kerajaan tidak bercadang menaikkan yuran pengajian di semua universiti awam (UA) seluruh negara pada tahun ini.

Menteri Pendidikan Tinggi, Datuk Seri Idris Jusoh berkata, tindakan ini dibuat bagi memastikan tiada pelajar yang tercicir untuk belajar di institusi pengajian awam termasuk di politeknik akibat ketidakmampuan ibu bapa.

Pada masa sama, Idris berkata, pelajar juga layak mendapat pembiayaan Perbadanan Tabung Pendidikan Tinggi Nasional (PTPTN) yang dapat membantu mereka meneruskan pengajian tanpa perlu bersusah payah seperti dahulu.

"PTPTN memainkan peranan membantu mereka yang kurang

mampu, dengan memberikan pendahuluan pinjaman RM1,500 kepada pelajar bagi kegunaan awal memasuki universiti.

"Hari ini tidak timbul ibu bapa perlu menjual kambing atau lembu bagi membiayai yuran kemasukan anak ke universiti seperti zaman dahulu," katanya.

Beliau berkata demikian pada Majlis Penyampaian Surat Tawaran Kemasukan Ke Politeknik Dan Penyerahan Wang Pendahuluan Pembiayaan (WPP) PTPTN sesi Jun 2016 di Sekolah Menengah Kebangsaan Agama (SMKA) Sabak Bernam di sini, semalam.

Yang turut hadir, calon Barisan Nasional (BN) untuk Pilihan Raya Kecil (PRK) Parlimen Sungai Besar, Budiman Mohd Zohdi.

Idris berkata, seramai 23,000 pelajar bakal memulakan pembelajaran di 34 politeknik seluruh negara pada 12 Jun ini, membuktikan ramai sudah percaya kepada sis-

Fakta
nombor

23,000
PELAJAR

Politeknik bakal memulakan pembelajaran

34 POLITEKNIK

Di seluruh negara

tem dan dasar politeknik yang diiktiraf dari dalam dan luar negara.

Politeknik jadi pilihan utama

"Kini, politeknik menjadi pilihan utama pelajar. Kemasukan pelajar ke politeknik juga tidak menghalang mereka memperolehi ijazah sebagaimana calon Barisan Nasional (BN) dalam PRK Parlimen Sungai Besar, Budiman Mohd Zohdi yang bermula di politeknik Kota Bharu seterusnya mengambil ijazah di Universiti Kebangsaan Malaysia (UKM) seterusnya ke peringkat sarjana di Universiti Putra Malaysia (UPM) dan kini mengambil ijazah Doktor Falsafah di UKM," katanya.

Beliau berkata, kebolehpasaran pelajar politeknik juga lebih tinggi berbanding siswa dari UA kerana institusi itu melahirkan tenaga kerja yang mahir dari aspek teknik dan vokasional.